

MGA HEBREOHANON,

KAPITULO DOS ¹

 ...? ... ang ania sa kongregasyon ug nalipay sa ... [Blangko nga bahin sa teyp—Ed.] Ug bueno ang unang Basahon sa Mga Hebreohanon, mao'y kang Pablo, sa nahibaloan nato, o gitooan nato. Pero ang mga teologo nagaduhaduha; wala gayud sila masayod kung unsa, o kung kinsa ang nagsulat Niini. Apan, nagatoo ako, nga ang si kinsa man nga may diyutay'ng espirituhanong pagpang-ila nasayod gyud nga si Pablo ang nagsulat niini. Kini'y—kini'y gikatoohan sàb, sa kadaghanan sa mga manunulat, nga si Pablo gayud. Ug kung unsa nga ang. . .

² Sa unang kapitulo, nahibaloan nato nga nagatuboy kana kang Ginoong Jesus. Oh, gisaysay niya, aron ipakita pinaagi sa—pinaagi sa kasinatian nga iyang nasinati didto sa pagpaingon niya sa Damascus. Bueno, si Pablo, sa sugod pa lang, usa siya ka tinuod nga teologo. Gikatudloan si Pablo ilalum ni Gamaliel, ang usa sa pinakamaayo nga mga magtutudlo niadtong panahona. Ug siya'y maantigo ug maalamon, ug usa gayud siya ka maalisto nga eskolar sa Biblia.

³ Ug hingsayran ko kini, kaniadtong nagpaingon siya sa Damascus, nga may dala nga mga sulat sulod sa iyang bulsa, aron ipadakop ang tanan nga anaa kaniadto sa mapanalanginong dalanon sa karaang Ebanghelyo, ug sinsero ang maong tawo. Apan, nagatoo gyud ko sa una pa nga tungod nga nakita mismo ni Pablo ang pagkamatay ni Esteban, sa tan-aw ko nga nakatandog gyud kadto kaniya. Kaniadtong miuyon siya sa pagpatay kang Esteban, ug siya pa gyu'y naghawid sa mga kupo niadtong nanagbato kang Esteban, nan sad-an sàb si Pablo sa dugo ni Esteban. Ug nagsugid siya, ug miingon, “Dili gani ako takus,” miingon, “tungod kay giula man nako ang dugo sa Iyang—sa Iyang, martir, nga si Esteban.” Tungod kay, nasaksihan niya mismo kadto.

⁴ Ug kung duna ka'y nasaksihan nga bisan unsa man, sad-an ka usab nga sama ra nga miapil ka sa pagbuhat sa maong butang. Busa kung nakasaksi ka, moingon, “Oh, bitaw, dili nila unta angay'ng gibuhat kini, kining *ingon ani-ug-ingon ana,*” magbantay ka sa imong ginasulti, tungod kay mahimo kang sad-an sa kung unsa ma'y imong isulti. Kung dili ka makasulti, nan ayaw na pagsulti og bisan unsa, pasagdi na lang. Dayon kung magtestimonyo ka nga usa ka ka Cristohanon, kung ingon-ana may tulubagon ka niana. Kita n'yo? May tulubagon ka ingon nga usa ka Cristohanon, ug mao nga kinahanglan mong ikinabuhi

kana. Ug pag nagasaad ang Dios og usa—usa ka saad diha sa Biblia . . . nakita ko ang usa ka lalaki dinhi nga naka-wheelchair. Pag nagasaad ang Dios, may tulubagon sàb Siya niana nga saad gawas kon Iya kanang tumanon. Siya, may tulubagon ang Dios pag nagasaad Siya. Ug may tulubagon ang mga Kasulatan hangtud nga mamatuman ang mga Niini. Kita n'yo? Kini—Kini nahisulat mismo dinha ingon nga—ingon nga mga pahayag nga gihimo sa Dios. Ug kinahanglan gayud nga mamatuman Kini kay kon dili nan may tulubagon ang Dios. Kita n'yo?

⁵ Ug busa si Pablo, ingon nga usa ka magtutudlo, ug sa iyang pagpaingon sa Damascus niadtong adlaw, mga, mga udto kadto, sa tan-aw ko. Adunay usa ka dakung Kahayag ang midan-ag gikan sa Kalangitan, ug nabuta siya Niadto, ug nahulog siya—siya sa yuta. Ug miingon siya nga gusto niyang masayran kung Kinsa kadto. Ingon pa siya nga usa ka Tingog ang misulti, ug miingon, “Saulo, Saulo, nganong ginalutos Mo ako?” Nagatoo ko nga sa ika-8 kana nga kapitulo sa Mga Buhat.

Ug miingon siya, “Si Kinsa ba Kining ginalutos ko?”

⁶ Ug misulti pag-usab ang Tingog, ug miingon, “Ako mao si Jesus.” Oh! “Ako mao si Jesus, ug malisud kanimo ang pagtindak sa mga espuela.” Ug unsa man si Jesus niadtong higayona? Si Jesus, Siya kadtong Kahayag, usa ka dakung Kahayag nga midan-ag.

⁷ Karon aron madasig kita ug makakuha og basihananan dinhi. Giunsa man Niya pagkahimong usa ka Kahayag, kon Siya’y usa man kaha ka Tawo? Karon, walay si kinsa man . . .

Adunay grupo sa mga sundalo nga kauban ni Pablo kaniadto, mga tigbantay sa templo, nga nangadto aron mangdakop. Si Pablo man ang punoang kapitan. Ug nangadto sila didto aron dakpon kadtong mga tawo, tungod sa mga ginabuhat niini ug uban pa, ug tungod sa relihiyosong paglaum niini nga anaa sa sulod nila.

⁸ Apan, niadtong higayona, atua si Jesus ingon nga usa ka dakung Kahayag. Karon, kung inyong mahindumduman, sa sinugdanan, si Jesus usa man ka Kahayag. Si Jesus mao ang Logos nga migula gikan sa Dios. Ug Siya mao ang . . . Siya mao ang Manulonda sa Pakigsaad nga nanguna sa mga anak sa Israel latas sa kamingawan. Ug Siya mao ang Haligi nga Kalayo nga ilang ginatan-aw. Ug Siya mao’y . . . Ug kaniadtong ania pa Siya sa yuta, miingon Siya, “Gikan Ako sa Dios, ug mobalik Ako ngadto sa Dios.” Busa kung gikan Siya sa usa ka Haligi nga Kalayo, paingon sa pagkahimong usa ka Tawo, dayon kung mibalik Siya sa kon unsa Siya kaniadto, nan mibalik Siya pag-usab ingon nga usa ka Kahayag. Ug mao kadto Siya sa dihang nakita Siya ni Pablo, usa Siya ka Kahayag.

⁹ Bueno, kadtong tanan nga mga sundalo nga kauban ni Pablo wala nakakita niadtong Kahayag. Kung ingon-ana mahimo kaha

nga may usa nga makakita Niini ug samtang ang uban dili makakita Niini? Sigurado gayud. Oo. Ngani siya, si Pablo, ra man ang nakakita Niadto, pero ang tanang uban pa kanila wala nakakita sa maong Kahayag.

¹⁰ Karon, kaniadtong gibilanggo pud si Pedro, hingsayran nato nga misulod kini nga Kahayag didto sa bilangoan, og giablihan ang mga pultahan. Ug siya'y . . . Gibutahan niadto nga Kahayag ang tanang uban pa sa mga tigbantay, samtang nagalakaw-lakaw sila, pero pagawas na diay si Pedro. Ug pag-abot na niya sa pultahan, miabli kadto sa iyaha ra, sa ingon ka hilum, og nasirado ra pud paggawas niya. Gikan sa sulod mismo sa bilangoan, mipaingon siya sa pultahan pagawas. Naabli kadto sa iyaha ra, og nasirado ra pud sa ingon ka hilum. Ug pagkahuman milusot ra siya sa rehas, og nakagawas na sa kalsada sa siyudad. Ug gilugod niya ang iyang mga mata, nga mora'g miingon, "Nagadamgo ra ba ko?" Wala man siya kahibalo kung unsay nahitabo. Apan, ang Manulonda sa Ginoo, ang mao gihapon nga Manulonda nga Haliging Kalayo nga nagpalakaw kang Moises sa dagat ug nagtungang niadto, oh, ug ang Dead Sea . . . natunga ang Dagat nga Mapula nga daw sa habog nga mga paril sa isig ka kilid, ug mitabok didto ang Israel.

¹¹ Ug pag-abot na nila ngadto sa nagabaha nga Jordan, wala Siya Mismo nagpakita didto. Apan atua gyud Siya didto, tungod kay Siya man ang nagpabuka niadto. Ug mitabok sila didto sa bulan sa Abril, kaniadtong napuno gyud og tubig ang mga kapatagan. Pero gipahunong Niya ang tingpamulak, ug gipahunong Niya ang niyebe sa pagkalanay, mao nga wala na mitaas ug mitaas pa ang tubig; basta na lang kadtong mihunong. Mao kana ang atong Jehovah. Mao kana ang atong Ginoong Jesus. Basta na lang kadtong mihunong; ug mitabok gyud sila sa yuta nga mamala.

¹² Bueno, nagsaad man ang Dios nga pagaatimanon Niya sila, busa obligado Siya sa Iyang saad. Karon, si Pablo, ingon nga nasayod niining mga butanga, ug nasayod gyud sa mga niini, mapribilihiyo siya, tungod kay direkta man nga nagpakigsulti ang Dios ngadto kang Pablo. Wala Siya nagpakigsulti sa mga sundalo nga kauban niya. Kondili kang Pablo lamang Siya nagpakigsulti.

¹³ Karon, kaniadtong ang—kaniadtong ang Manulonda sa Ginoo mikanaug, diha sa porma nga usa ka bitoon; ug ang mga magbabantay sa bitoon, ang maalamon nga mga lalaki nga taga India, sa dihang, nakita nila kadtong Bitoon ug gisundan nila Kadto sa gilay-on nga gatusan ka milya. Ug miagi Kadto sa matag obserbatoryo, tungod ginatan-aw man sa mga tawo kaniadto ang oras pinaagi sa mga bitoon. Ug wala gayu'y si kinsa man ang nakakita niadto nga Bitoon kondili ang maalamon nga

mga lalaki lamang. Oh, pagkanindot! Dili ba kana nakapalipay kaninyo?

¹⁴ Busa, kita n'yo, ang Dios wala gyud nagapakighilambigit sa mga organisasyon. Wala Siya nagapakighilambigit sa mga grupo sa mga tawo. Kondili nagapakighilambigit Siya sa tagsa-tagsa. Sa tagsa-tagsa Niya ginapadayag ang Iyang Kaugaligon. Ug karon—karon ginasulti ko kini, dili ingon nga . . . nasayod ang Dios sa akong kasingkasing. Ug dili ko ginasulti kini para sa kaugalingon ko, para madayeg ako; kondili, aron lang nga maipahayag kini. Bueno, nasayod ba mo, nga kadtong mao ra nga Dios, kadtong mao ra nga Jesus, ania mismo uban kanato niining buntaga? Nasayod ba mo, nga ang matag usa kaninyo adunay diyutay'ng, pang-indibiduwal nga pagpamatuod niini karon, nga ania Siya mismo? Ug mao'y . . . aduna Siya'y gibuhat para kanato niining panahona nga wala Niya gibuhat sa ubang mga panahon; gitugot Niya nga maretratohan ang Iyang Hulagway sa niini nga panahon. Ato man gani Kining gisab-it *dinha*. Kita n'yo? Ang Haligi nga Kalayo, ang mao mismo nga Ginoong Jesus.

¹⁵ Matikdi n'yo kung sa unsang paagi Siya nagapamuhat karon. Kung Siya ang mao mismo nga Ginoong Jesus, nan buhaton gyud Niya ang mao gihapon nga mga butang, kay miingon man ang Biblia, “Siya mao sa gihapon kagahapon, karon, ug hangtud sa kahangturan.”

¹⁶ Kaniadto, adisir si Pablo nagpahayag og unsa man, bahin sa kon kini ba'y husto o sayup, miadto una siya sa Egipto ug migahin didto og tulo ka tuig, aron hibaloong kung kini ba'y uyong sa Kasulatan o dili. Nasayod ba mo niana? Human sa pagkakabig ni Pablo, miadto siya sa Egipto sulod sa tulo ka tuig. Didto siya mipuyo, ug didto niya nakat-onan kining mahimayaon nga kaalam.

¹⁷ Karon, dili ingon nga pagkumpara, kondili ginasulti ko lang sa inyo kung unsa nga ang Balaang Espiritu nagapabilin nga mao sa gihapon. Karon, ang akong iglesia dinhi makahinumdom man, nga niadtong pila na ka tuig ang milabay, magpakita kini nga Manulonda ug magpakita Siya og mga butang. Medyo may pagduhaduha pa ako bahin Niini kaniadto. Nasayod kamong tanan niini, kamong mga karaan na dinhi. Kung inyong . . . Kung mao man, ipataas n'yo ang inyong kamot, kon nakadungog na kamo bahin niini. Oo. Ania, ania man ang iglesia, hangtud karon, ang mga karaan na dinhi. Kita n'yo? Nagduhaduha ako kaniadto, tungod kay giingnan man ko sa mga magwawali nga Kini iya kono sa yawa. Ug medyo mitoo pud ko niadto, apan naghulat gyud ako. Wala sa ko'y gisulti nga unsa man kaniadto mahitungod Niini.

¹⁸ Apan, oh, dalaygon ang Ngalan sa Ginoo! Usa ka gabii, didto, mikanaug Siya, ingon nga usa ka Manulonda, ug

gipadayag Kini diha sa mga Kasulatan, nga Siya gyud kadto. Ug sa dihang nakita ko Kini sa mga Kasulatan, pagkahuman gisangyaw ko na sa tibuok kalibutan Kining, maong Mensahe.

¹⁹ Sukad niadto nanungha na sila ni Oral Roberts, A.A. Allen, Tommy Osborn, Tommy Hicks, ug ang uban pa. Kita n'yo? Usa kini ka Mensahe alang sa mga tawo.

²⁰ Ug si Jesus mao sa gihapon kagahapon, karon, ug hangtud sa kahangturan. Sumala gayud sa Kasulatan, Siya mao sa gihapon. Mao sa gihapon ang Iyang ginabuhat. Tungod mao man Siya sa gihapon. Ug mao sa gihapon ang Iyang pagpamuhat. Mao sa gihapon ang pagpadayag Niya sa Iyang Kaugalingon. Ug ania Siya, niining buntaga, nga mao sa gihapon. Ngani karon mahimo nga makita nato Siya; mahimo pud nga dili. Pero bisan unsa pa man, aduna gyud kita'y pagpamatuod nga ania Siya mismo karon.

²¹ Bueno, karon nahibaloan nato nga, si Pablo, mahitungod niini nga kasinatian, ug sa pagsulat niya niini nga mga sulat, kadaghanan sa mga niini, nasulat niya sulod sa bilanggoan, og gitandi niya ang Daan ug Bag-ong Tugon. Karon hinumdumi n'yo, ang ulahing manunulat niining Biblia, pinaagi og pagdihog, mikanaug ang Dios ug gisultihan siya, "Kung may si bisan kinsa nga magadugang og bisan unsang butang ngadto Niini o magataktak og bisan unsang butang gikan Niini, pagataktakon usab ang iyang bahin, gikan sa Libro sa Kinabuhi." Busa dili gyud kita mangahas nga magdugang ni usa ka butang ngadto Niini. Oh, kinahanglan magpabilin ra gyud Kini sa kung unsa Kini, og wala gayu'y bisan unsang butang ang angay'ng idugang ngadto Niini. Ug kinahanglan kitang makigbisog sa pagpanalipod sa tanan-tanan nga nakasulat Niini. Dili ko gusto og unsa man nga mosobra, ug dili pud ko gusto og unsa man nga makulang. Ang gusto nako kung unsa lang gyud ang ginasulti Niini.

²² Karon, kining Basahon sa Mga Hebreohanon, ang hinungdan nga gipili ko Kini; ang usa ka katuyoan, usa ka butang; tungod niining sulat, "Minahal nga Igsoong Branham," ug uban pa. Ug, ako—ako, ginatinguha nato nga magpabilin gayud sa Pulong.

²³ Karon, ang unang kapitulo, mahitungod kana sa paghimaya kang Jesus, busa Siya Mao ang pinaka ginapahinungdan dinha. Ug gipahibalo kanato ni Pablo, niadtong miaging gabii, nga Siya atua sa mahimayaong sinugdanan. Ug hingsayran pud nato nga Siya walay lain kondili si "Melquisedec, ang Hari sa Salem," ang Gamhanan nga ginapahinungod sa ika-7 nga kapitulo.

²⁴ Ug karon, niining buntaga, atong hisgotan Siya sumala sa usa pa ka—usa pa ka anggulo, gikan sa ika-2 nga kapitulo. Bueno, human nga gihatag kanato ni Pablo kining mahimayaon, og kahibulongan nga Mensahe, mahitungod sa paghimaya kang Jesus, "Ug bisan ang mga Anghel gipasimba niya Kaniya."

Ug nahunahuna ko, dinhi, nga ang kalibutan, kung unsa nga madaan kini: “Ug Iyang pagalukoton kini sama sa usa ka kupo, ug sila pagalaglagon, apan Ikaw magapabilin.”

²⁵ Ug dinha sa ika-2 nga kapitulo, o, sa ika-2 nga bersekulo, nagatoo ko nga mao kana, “Siya misulti kanato niining mga panahona pinaagi na sa Iyang Anak.” Ug, matikdi n’yo, “Sa nagkalainlaing mga panahon ug nagkalainlaing mga pamaagi Siya misulti kaniadto pinaagi sa mga propeta.” Nahisgotan na nato ug nahibaloan kung unsa gyud ang mga propeta, ug kung unsa nga gipadala sa Dios ang Iyang Mensahe pinaagi sa mga propeta. “Apan sa niining kaulahiang adlaw nagpakigsulti Siya pinaagi na sa Iyang Anak, nga si Jesus, pinaagi sa Balaang Espiritu. Misulti Siya pinaagi sa mga propeta, kaniadto.” Dayon atong gibalikan ug nahibaloan nato, nga ang tanan niadto nga mga propeta anaa kanila ang Espiritu ni Cristo.

²⁶ Gibalikan nato si Joseph ug nahibaloan nga siya’y hingpit nga tipo ni Cristo. Gibalikan pud si Moises ug nahibaloan nga siya’y hingpit sàb nga tipo ni Cristo. Dayon miadto usab kita kang David. Ug kaniadtong gisalikway si David sa Jerusalem, nga wala mahibalo kon ngano, ug mitungas sa bungtod ug milingi, didto sa Bukid sa Olivo, ug mihilak tungod sa Jerusalem tungod kay gisalikway man siya. Walo ka gatus ka tuig human niadto, ang Anak ni David gisalikway pud ingon nga Hari, sa Jerusalem, ug atua pud sa mao gihapon nga bungtod ug mihilak. Oh, ang Espiritu kadto ni Cristo, nga nagapakighilambigit sa tagsa-tagsa!

²⁷ Karon, misugod si Pablo, sa pag-ingon:

Busa kinahanglan nga hatagan tà sa labing mainitong pagtagad ang mga butang nga atong hingdunggan, . . .

²⁸ Sa ika-2 nga kapitulo, karon, nagasugod na kita.

Busa kinahanglan nga hatagan tà sa labing mainitong pagtagad ang mga butang nga atong hingdunggan, tingali unya . . . ipang-anod kita gikan niini.

²⁹ Oh, hinaut nga ipasabot kini sa Dios dinhi niining tabernakulo karong buntaga. Ginaampo ko nga ipatuhop gyud kana sa Balaang Espiritu diha sa kinahiladman sa inyong mga kasingkasing. “Kinahanglan nga hatagan tà sa labing mainitong pagtagad ang mga butang nga atong hingdunggan.” Mamahimong unsa na kaha nga matang sa mga tawo kita, pag nakita nato ang gamhanang Jehovah nga mikanaug ug gibuhat ang mga butang nga ginabuhat Niya, ug makita ang mga niini nga nagakatakdo gayud, Kasulatan sa Kasulatan, nga ang mga niini mao gyud ang Kamatuoran? Pero nagalingkod-lingkod lang kita usahay nga daw sa mga kalunggo diha sa troso sa kahoy, ug nga wala gayu’y pagpakabana. Angay unta nga mahimo kitang okupado, matag minuto, sa pagpaningkamot

nga mangkabig og mga tawo paingon kang Cristo. Angay unta nga mahimo kitang buhi nga mga bato. Dili gyud kita angay'ng magtinapolan nga sama sa kung unsa kita. Nagasimba kita, ug nakita nato si Ginoong Jesus nga adunay ginapamuhat, o—o ginapanalanginan kita sa usa ka mahimayaon nga paagi, ug pagkahuman kita'y—managpanguli kita ug moingon ra, “Nindot kaayo ang panagtigum.”

³⁰ Bueno, ang pagwali sa Pulong, malipay man kita niana, pero dili kana ang mahinungdanong butang. Dili kana. Dili angay nga simbahon lang nato ang Ginoo pagkahuman nato sa pagwali sa Pulong, sama sa kasagaran natong ginabuhat, nga ginasimba nato Siya. Maayo man kana. Apan kinahanglan gyud natong simbahon Siya sa matag oras sa atong kinabuhi. Pag anaa kita sa trabaho, angay natong simbahon Siya. Sa matag higayon nga adunay kahigayonan, simbaha n'yo ang Ginoo pinaagi sa pagtestimonyo mahitungod Kaniya.

Kung duna kamo'y makita, kamong mga kababayen-an, kon may makita kamong usa ka babaye nga anaa sa sayup, simbaha n'yo ang Ginoo pinaagi sa pag-aghat kaniya ug moingon, “Igsoon, aduna baya'y mas maayo nga kinabuhi kaysa niana.”

³¹ Kamong mga kalalaken-an sa inyong trabaho, pag may madungog kamo og usa ka tawo nga ginagamit ang Ngalan sa Ginoo sa pasipala, pangita mo og kahigayonan nga makaduol, ug hawiri siya sa kamot, ug moingon, “Abi nimo, aduna baya'y mas maayo nga kinabuhi kaysa niini. Dili mo man angay'ng gamiton ang ingon-ana nga mga pulong.” Ug sultihi siya sa usa ka malulot, og maaghop nga paagi. Ang tanan nianang mga butanga usa na man ka pagsimba.

Ug pag makakita kita og usa ka tawo nga may sakit, ug ginaingon na sa doktor nga wala na kono'y mabuhat pa, angay natong simbahon ang Ginoo pinaagi sa pagsulti kanila, “Adunay Dios sa Langit nga nagatubag sa pag-ampo.”

³² Ug dayon pag makita nato nga nagakahitabo kanang mga butanga, nga makita nato nga nagakahitabo ug nagakatuman, dili gyud nato tugotan nga mapalagpas ang ingon niining mga butang. Ginapalagpas ra man gud nato kini sa atong mga kamot. Ingon niana ang nagakahitabo sa dakung iglesiang Pentecostal sa karon. Ginapalagpas ra nila ang pinakamaayong butang, nga unta anaa na man kini sa ilang mga kamot. Ug, tan-awa n'yo kung unsay ilang gibuhat, ginabuhat na nila ang sama sa ginabuhat sa uban pang mga iglesia. “Sila nanaglakaw subay sa pag-... sa agi ni Korah, ug mao nga nangalaglag; ug sa agi ni Cain, ug nangalaglag diha sa pagsupil ni Korah.”

³³ Nanag-organisa sila. Imbis nga magkaaduna og pagkamanagsoon kon diin mamahimo kitang mausa, nanag-organisa hinoon sila. Nanaghimo og gagmay'ng mga organisasyon ug diyutay'ng mga ismo, ug gumikan niana

nangabungkag hinoon ang pagkamanagsoon. Ug kung dili n'yo mamatikdan, sundon pud kana sa mga Baptist ug mga Presbyterian, tungod kay, "Makahimo ang Dios sa niining mga bato sa pagpatindog og mga anak kang Abraham." Ug atong—atong napalagpas kini sa atong mga kamot tungod sa atong pagkabahin-bahin.

³⁴ Giunsa man pagwala sa mga Indiano kini nga nasud ngadto sa mga tawong puti? Tungod kadto sa ilang pagkabahin-bahin. Kung naghimo pa unta sila og usa ka dakung panagkumbuya. . . . Pero nanag-away man hinoon sila sa usa'g usa. Napapabilin unta nila ang ilang teritoryo kung nagkahiusa pa sila.

³⁵ Sa unsa mang hinungdan nga mawala kini sa ato? Tungod kay nagkabahin-bahin man kita. Sa unsa mang hinungdan nga nawala sa ato ang atong kasinatian sa Dios, tungod kini kay nagkabahin-bahin kita. Aduna kita'y gitukod, ug gitawag *kini* nga—nga Methodist, ug *kini* ang Baptist, ug *kini* ang Assemblies, ug *kini* pud ang Oneness, ug *kini* ang *uban-pa*, ug ang church of God, ug ang Nazarene, ang Pilgrim Holiness. Ginabungkag nato ang Lawas ni Cristo. Dili man unta kita angay'ng magkabahin-bahin. Mahimong managlahi ang atong mga ideya, apan mamahimo unta kitang kasingkasing-sa-kasingkasing nga mga mag-igsoon. Gusto sa Dios nga mahimo kitang ingon niana. Namatay Siya alang sa kinatibuk-ang Iglesia sa Dios. Ug mao nga dili nato gusto nga magkabahin-bahin.

Karon kinahanglan nga hatagan tà og labing mainitong pagtagad. . . tingali unya ipang-anod kita gikan niini.

Kay kong ang pulong nga gisulti pinaagi sa mga manulonda nagapaila nga malig-on, . . .

³⁶ Nadungog n'yo ba Kini? "Kung ang pulong nga gisulti sa mga manulonda. . ." Bueno, ang *manulonda* mao man ang "mensahero." Ang pulong nga *manulonda* nagakahulogan og "usa ka mensahero." Ug bag-o lang natong nahisgotan kini, sa unang basahon dinhi, "Ang Dios, sa nagkalainlaing mga panahon ug nagkalainlaing mga pamaagi, nagpakig-istorya sa atong mga ginikanan pinaagi sa mga propeta." Kadto mao ang mga mensahero sa Dios. Ug sila, ingon nga sila ang mga mensahero sa Dios, nan sila mao'y mga manulonda sa Dios. Ang mensahero usa ka manulonda; o ang manulonda usa ka mensahero, diay.

³⁷ Usa ka mensahero! Usa ikaw ka mensahero, niining buntaga. Ikaw. . . Usa ikaw ka mensahero sa maayong balita o kaha usa ka mensahero sa di-maayong balita. Oh, dili ba pagkanindot niini, nga masayran nga mga pinadala kita, nga kita'y mga manulonda, nga mga mensahero sa pagkabanhaw? Ug kita mao ang mga mensahero sa Dios nganhi sa makasasala nga kalibutan, nga buhi gayud si Cristo. Sa atong mga kasingkasing, buhi Siya.

Sa atong mga espiritu, buhi Siya. Ug Iya kitang gikuha gikan sa ubos og ngil-ad kaayo nga pagkinabuhi sa sala, ug gibayaw kita, ug gihatagan kita og usa ka “alleluyah” sa atong kalag, ug gihimo kitang mga bag-ong binuhat. Mga mensahero kita, mga manulonda sa Pakigsaad. Pagkaanindot gayud!

³⁸ Ug karon, diha sa Daang Tugon, “Kung—kung ang pulong nga gisulti sa mga manulonda nagapaila nga malig-on,” nan sa ingon-anang paagi husto gyud kadto. Sa Daang Tugon, adisir mahipadayag ang pulong sa usa ka propeta, kinahanglan úna kini nga masusi ug mapamatud-an. Dili sila kaniadto nagapasagad niini, sama kanato sa karong panahon.

³⁹ Motambong lang ug pag magkaaduna na og unsa man nga matang sa sensasyon, o unsa pa man, “Oh, himaya sa Dios, mao na kini!” Sayup gyud kamo.

Ang Biblia miingon, nga, “Sa kaulahiang mga adlaw, sundog-sundogon sa yawa ang Cristianismo, nga halos kapareho gyud, hangtud nga malimbongan niini ang mismong mga Pinili kon mahimo pa.” Husto kana. Mao nga, kinahanglan gyud natong susihon kini.

⁴⁰ Ug giunsa man nila kini pagsusi sa ilang panahon kaniadto? Pinaagi sa Urim Thummim. Ang tabon-sa-dughan ni Aaron, nga adunay mga batong: carbuncle, jaspe, diyamante, ruby, safiro. Tanan niadtong mga bato, nga nagarepresentar sa pagkahimugso sa dose ka patriarca, atua sa tabon-sa-dughan ni Aaron. Ug pag nagpropesiya ang usa ka propeta, ug modan-ag niadto ang sagrado nga Kahayag, ang ingon sa Dios, “Kamatuoran kana.” Apan, bisan unsa pa ka daw tinuod kadto, kung dili kadto modan-ag niadto, nan dili kadto Kamatuoran. Pero, nahunong na man kadto nga Urim Thummim lakip sa pagka-sacerdote.

⁴¹ Apan sa karong panahon kining Biblia mao ang Urim Thummim sa Dios. Ug pag magpropesiya ang usa ka propeta, kinahanglan bug-os gyud kining modan-ag sa Biblia. Kung ingon-ana, ang ingon sa Dios, dayon mokanaug Siya ug pamatud-an Kini.

⁴² Oh, mahimaya ko gayud ang Dios karon! Nahinumduman ko hinoon ang usa pa ka Domingo sa buntag, nga mga ingon niini sàb, kaniadtong mogikan na ako sa tabernakulo. Ug nanaghilak kamo kaniadto ug nanaghangyo sa ako nga dili na lang ko mogikan. Pero, sa dihang, nagwali ako mahitungod kang David ug Goliath, ug kung unsaon n’yo sa pag-atubang kining mabugnaw, og walay-pagpakabana nga kalibutan nga nagaingon nga milabay na ang mga adlaw sa mga milagro.

⁴³ Ingon ko, “Adunay higante, ug sa dihadiha nga mapatay nato siya, nan madasig na ang tanang uban pa kanila.” Ug gihatag kadto sa Dios. Ug dayon aduna na’y usa ka Oral Roberts

ug usa ka Jagers, ug uban pa, nga mihulbot sa Espada, ug gipakig-awayan nato ang kaaway pagawas sa yuta, og gipatakum ang ilang mga baba. Dili na sila makaingon nga wala na'y nagakahitabo nga mga milagro, tungod kay ania man mismo ang mga niini. Sigurado. Eternal ang Pulong sa Dios. Midan-ag Kini sa Urim. Midan-ag sa Pulong, nga mao ang Iyang Urim Thummim. Ug sa diha nga modan-ag kini Dinha, tinuod gyud kini.

Ug sa kinsa man nga may panginahanglan, kung usa ikaw ka makasasala, og gusto mong masayran kung unsaon nga mamaluwas nan, “Tumoo kamo kang Ginoong Jesus Cristo.”

⁴⁴ Karon, daghan kaayong mga butang ang kinahanglan kono ninyong buhaton. “Kinahanglan ta konong magbag-o. Kinahanglan mo konong buhaton ang *ingon-ani* ug buhaton ang *ingon-ana*, aron nga maluwas.”

Nahinumduman ko hinoon ang tigbantay sa bilanggoan nga taga-Filipos, kaniadtong gipangutana si Pablo niadtong tigbantay, “Unsa ma'y kinahanglan kong buhaton aron mamaluwas?”

Siguro kon kamo kadto o kaha ako, tingali'g gisulti nato kaniya ang mga butang nga *dili* niya angay'ng buhaton. “Kinahanglan mohunong ka na sa pag-inom og ilimnong makahubog. Kinahanglan mohunong ka na sa imong—imong pagsugal-sugal. Kinahanglan mo nang undangan *kini*. Kinahanglan mo nang undangan *kana*.”

Pero dili ingon-ana ang gisulti ni Pablo sa iyaha. Gisulti lang niya sa iyaha ang mga butang nga *angay* niyang buhaton. “Tumoo ka kang Ginoong Jesus Cristo, ug mamaluwas ka.”

⁴⁵ Karon, “Siya nga nagapatalinghug sa Akong mga Pulong ug nagatoo Kaniya nga nagsugo Kanako adunay Kinabuhing Walay Katapusan.” Mao kana ang Urim Thummim nga nagadan-ag, San Juan 5:24. “Ako mao ang Ginoo nga mao'y nagaayo sa tanan mong mga balatian.” Santiago 5:14, “Ipatawag ang mga anciano, dihogang sila og lana, ang pag-ampo nga inubana'g pagtoo magaayo sa masakiton.” Nagadan-ag ang Urim. Kita n'yo? Kana mao ang Eternal nga Pulong sa Dios.

⁴⁶ Dili ko igsapayan kung unsa man kadaghan ang managpanungha nga mga ateista, mga dili-magtotoo, mga walay Dios, og mga maduhaduhaon. Barugan man sa Dios ang Iyang Pulong. Nagsaad Siya nga buhaton Niya kana.

⁴⁷ “Ug kinahanglan nga hatagan ta sa labing mainitong pagtagad kining mga butang nga atong hindunggan, tingali unya ipang-anod kita niini. Kay kung ang pulong nga gisulti pinaagi sa mga manulonda nagapaila (ang mga propeta) nga maligon. . .” Malig-on ba? Puede kitang mogahin og usa ka semana sa paghisgot bahin niini.

⁴⁸ Malig-on ba kini kaniadtong misulti si Moises? Sigurado gayud.

Unsa man usab si Elias, niadtong atua siya ibabaw sa bukid? Gisultihan siya sa Ginoo, “Tumungas ka didto, Elias. Magpabilin Ako didto uban kanimo; gusto Kong magpakig-fellowship.” Gusto sa Dios nga magpakig-fellowship sa Iyang mga katawohan. Pero dili man kita makapabilin sa ingon ka dugay aron makapag-fellowship Siya kanato. Okupado kaayo kita nga nagabagdoy-bagdoy, gikan sa usa ka lugar ngadto sa usa na usab ka lugar, ug kung unsa na lang. “Magpabilin ka, Elias.” Gusto Niya og tulo ka tuig ug unom ka bulan nga pagpakig-fellowship. Pero dili gani tà makagahin Kaniya og bisan tulo ka minuto man, lang. Tulo ka tuig ug unom ka bulan nga walay-hunong nga pagpakig-fellowship. Oh, gusto ko kana! Miingon, “Ayaw kabalaka bahin sa pagalutoon; naiandam na kana. Ang mga uwak ang magpakaon kanimo. Ug mamahimong okey ra ang tanan. Gusto Ko lang magpakig-fellowship.” Kadtong tigulang nga propetang, si Elias, nga atua didto ibabaw sa bukid, samtang nagapakig-fellowship siya sa Dios, aba, miingon ang kapitan, “Sa tan-aw ko kinahanglan ko nang motungas didto ug pakanaugon siya.” Karon, ayaw gayud sulayi nga putlon ang ingon-ana nga pagpakig-fellowship.

⁴⁹ Tuod man, mitungas ngadto ang kapitan, uban ang daghang lalaki nga mga kasundalohan, nga mga singkwenta. Ug ingon siya, “Ako—ako—mianhi ako aron pakanaugon ka na, Elias.”

⁵⁰ Ug mitindog si Elias. Matikdi n’yo, ania ang propeta sa Ginoo! Ingon niya, “Kung ako usa ka alagad sa Ginoo, pakanaugon unta ang kalayo gikan sa langit ug pagalamyon kamo.” Ug mikanaug gyud ang kalayo. Miingon ang kapitan . . .

⁵¹ “Oh, nasayod ka ba kung unsa?” Ang hari, diay, ang miingon, “Tingali’g usa—usa ra kadto ka liti, usa lang ka kilat nga milabay, ug naigo sila. Magpadala na usab ako og singkwenta.”

⁵² Mitindog si Elias, ang usa sa mga manulonda, ang iyang pulong malig-on man. Kinahanglan niya nga mahimong matarung nga bayad sa tanan-tanan nga nabuhat nga sayup. Ingon niya, “Kung ako usa ka alagad sa Ginoo, mokanaug ang kalayo.” Ug nangasunog kadtong ikaduhang singkwenta. Oo. Matag bayad!

Kay kong ang pulong nga gisulti pinaagi sa mga manulonda nagapaila nga malig-on, ug ang tanan nga paglapas ug pagsuki nakadawat sa matarung nga bayad. . .

⁵³ Karon, ania ang makuyaw nga butang, ang sunod nga bersekulo.

Unsaon tà sa paglikay, . . .

54 “Unsaon tà sa paglikay?” Kung ang tingog ni Elias naghatud og kalaglagan, tungod kay usa man siya ka manulonda sa Ginoo, nan unsaon man nato sa paglikay pag mosulti na ang Tingog ni Cristo? O, sa unsa mang paagi nga kita mapakyas sa dihang naiampo na kamo, kung Kini man mao ang Tingog ni Cristo? Kung gisugo ni Cristo ang Iyang Iglesia nga mag-ampo para sa mga may sakit, ug buhaton sa Iglesia kung unsay gisulti Niya nga Iyang . . . nga ilang pagabuhaton, kung ingon-ana sa unsa mang paagi nga mapakyas Kini? Dili gyud mamahimo. Mahimo kamong mapakyas, apan dili gyud Kini mahimong mapakyas. Ug basta ginatuman n’yo lang Kini, pangunahan gayud kamo Niini.

55 Kung mapakyas man kamo, nan kamo mismo ang napakyas. Tungod mipahilayo man kamo sa Pulong. Pero samtang nagapabilin kamo sa Pulong, dili Kini mahimong mapakyas. Kay ang pulong sa mga propeta nagbuhat og *ingon-ani-ug-ingon-ana*, unsa pa kaha ang Pulong ni Cristo?

Unsaon tà sa paglikay, kung talikdan tà ang ingon nga pagkadaku nga kaluwasan; nga sa sinugdan gisulti nganhi kanato pinaagi sa Ginoo, ug gipamatud-an kanato pinaagi kanila nga mga nagpakadungog kaniya;

56 Palandunga n’yo Kini, nga gisulti sa Ginoo. Makapila ba ka higayon nga mahimo nato kining balikan? Mahimo ba kita nga mohunong, niini sulod sa usa ka oras? Sa diha nga mianhi si Jesus, Siya mao sa gihapon kagahapon, karon, ug hangtud sa kahangturán.

57 Karon, timan-i n’yo, sa sinugdan gisulti una ni Jesus, Mismo, ug dayon gipamatud-an sa mga nagpakadungog Kaniya. Karon paminawa n’yo Siya.

58 Kaniadtong mianhi Siya sa yuta, wala Siya nagpahamayag nga usa ka mananambal. Ingon Siya, “Dili Ako ang nagabuhat sa mga buhat; ang Akong Amahan kini nga nagapuyo Kanako. Siya ang nagabuhat sa mga buhat. Walay bisan unsa nga arang mabuhat ang Anak sa Iyang Kaugalingon, gawas lamang sa Iyang makita nga ginabuhat sa Amahan,” San Juan 5:19.

59 Matikdi n’yo kaniadtong miduol si Felipe Kaniya. Si Natanael . . . Human sa pagkakabig ni Felipe, miadto siya ug gidala si Natanael. Miingon, “Umari ka, tan-awa kung Kinsa ang among nakaplagan: si Jesus nga taga-Nazaret, ang Anak ni Jose.”

60 Ug ingon siya, “May maayo bang butang nga mogula gikan sa Nazaret?”

61 Miingon, “Ari gani ka, og tan-awa.” Sa ingon niana nga paagi ka makumbinsi: ang pamatud-an Kini. Umadto ka ug tan-awa. Oh, mao kana ang pinakamaayo nga nadungog ko sukad. Umadto ka ug tan-awa mismo. Ayaw pagtindog-tindog lang ug

mangsaway diha sa kilid, kondili, “Sulayi ninyo ang tanang butang, ug kupti ninyo kung unsa ang maayo.” Umadto ka ug tan-awa.

⁶² Naglakaw sila didto sa dalan, nga nag-istoryahanay. Sa diha nga miduol na siya sa Presensiya ni Ginoong Jesus, miingon si Jesus, “Tan-awa ang usa ka Israelinhon nga kaniya walay limbong.”

⁶³ Mora gyud siya niadto og gipanitan, halos. Mitan-aw siya sa palibot, miingon, “Bueno, Rabbi, kanus-a Mo man ako hiilhi? Wala Ka pa man nakakita kanako sukad. Giunsa Mo man pag-ila kanako?” Ingon ni Felipe. . .

⁶⁴ “Sa wala pa, siya mitawag. . .” Miingon, “Sa wala ka pa gitawag ni Felipe, kagahapon, sa didto ka pa ilalum sa kahoy’ng higuera, nakita Ko na ikaw.” Amen.

⁶⁵ Ingon siya, “Ikaw mao ang Anak sa Dios. Ikaw mao ang Hari sa Israel.”

⁶⁶ May usa pud ka babaye ang miduol sa Iyang Presensiya, ug ingon Niya, “Lakaw, og kuhaa ang imong bana.”

Ingon ang babaye, “Wala man ko’y bana.”

⁶⁷ Miingon, “Tinuod kana. Nagkaaduna ka na og lima, ug ang usa nga gikaipon mo karon dili man imong bana. Tinuod ang imong giingon.” Palandunga n’yo kana.

⁶⁸ Ingon ang babaye, “Sir, naila ko nga Ikaw usa ka Propeta. Tungod, nasayod man kami nga pagmoabot ang maong Mesias isulti Niya kanamo ang tanang butang.”

⁶⁹ Miingon Siya, “Ako mao Siya, nga nagapakigsulti kanimo.”

⁷⁰ Ug midalagan ang babaye ug gisuginlan ang mga tawo sa siyudad, “Umari kamo, tan-awa ninyo ang usa ka Tawo Nga nagsulti kanako sa tanan nga nabuhat ko. Dili ba mao na kini ang Mesias?” Gisulti kadto sa Ginoo.

⁷¹ Unsa na ma’y nahitabo? Miingon si Jesus, sa wala pa Siya mibiya, “Ang mga butang nga Akong ginabuhat, pagabuhaton usab ninyo.” Husto ba? “Ang mga butang nga Akong ginabuhat pagabuhaton usab ninyo, gani mas daghan pa niini, kay Ako moadto sa Amahan.” Oh, mahanduraw ko sila samtang nanglakaw sila, sa bisan asa. Marcos 16, “Nanglakaw sila sa tanang mga dapit, nanagwali; ang Ginoo namuhat uban kanila, og nagapanghimatuod sa Pulong.”

Ug dinhi, si Pablo, mao ra usab ang iyang ginasulti. Miingon siya nga ang—ang Ebanghelyo gisugdan una og wali ni Jesus, ug gipamatud-an nganhi kanato pinaagi niadtong mga nagpakadungog Kaniya. Mao kana ang Batong Patukoranan. Oh, dalaygon ang Ngalan sa Ginoo! Mao kana ang Batong Patukoranan.

⁷² Ug ang hunahunaon, nga duha na ka libo ka tuig ang milabay. Nanagpanungha ang mga ateista, ug mga dili-magtotoo, ug mga maduhaduhaon, ug mga walay Dios. Apan, sa karong panahon, ginapanghimatud-an gihapon sa mao ra mismo nga Jesus ang Iyang Pulong sa mao gihapon nga pamaagi pinaagi niadtong mga nagpakadungog Kaniya. “Patalinghugi n’yo Siya,” dili buut ipasabot nga maminaw lang og usa ka wali. Ang buut ipasabot, patalinghugi mismo *Siya*. Oo.

⁷³ Unsaon man nato pagpakaikyasa? Asa man kita moikyasa? Oh, moingon mo, “Dalaygon ang Dios, miyembro ako sa iglesiang Methodist. Usa ako ka Presbyterian. Usa ako ka Pentecostal.” Wala gyud kana’y kahilambigitan ni usa ka butang Niini. Ug mopadaplin mo sa kilid ug gusto n’yong tawgon Kini nga “espiritismo, o usa ra ka pagbasa sa hunahuna, o usa ka yawa,” o ingon niana. Makauulaw sila!

⁷⁴ “Kung ang matag pulong pinaagi sa mga manulonda malig-on...” Miingon si Jesus, “Kini’y dili... Sa diriyut lamang panahon, ug ang kalibutan dili na makakita Kanako. Apan, kamo makakita Kanako, kay Ako magauban kaninyo, bisan sa sulod ninyo, hangtud sa katapusan sa kapanahonan.” Ug pag makita na nato Siya nga mokanaug, aron padayon nga panghimatud-an ang Iyang Pulong, unsaon man nato pagpakalingkawas kung magpakitabang kita sa usa ka iglesya, o sa usa ka organisasyon, o sa denominasyon, o sa ato mismong gamay’ng teorya? Mas maayo pa nga pangbuhian n’yo na kana. “Kay ang matag sala nakadawat og hustong bayad ilalum sa mga manulonda unsa pa kaha pag ang Anak na sa Dios ang mosulti gikan sa Kalangitan, aron ipadayag ang Iyang Pulong! Unsaon man nato sa paglikay, kung talikdan ta ang ingon ka dakung kaluwasan?” Oh, grabe! “Ang Dios usab...”

Ika-4 nga bersekulo:

Ang Dios usab nagpamatuod niini, . . .

⁷⁵ Matikdi n’yo kini. Nagapamatuod mismo ang Ginoo. Oh, malipayon kaayo ako tungod niana! Nagapamatuod ang Ginoo.

⁷⁶ Ania. Kaniadtong atua si Elias sa bungtod, ug miingon siya, “Kung ako usa ka tawo sa Dios, pakanaugon unta ang kalayo gikan sa Langit ug sunogon kamo.” Gipamatud-an mismo sa Dios nga *usa* siya ka tawo sa Dios.

Nagapamatuod man ang Dios sa kanunay. Nagapamatuod pud ang inyong kinabuhi. Wala ko kahibalo kung unsa ang inyong testimonyo, apan ang inyong kinabuhi nagasulti sa ingon ka lanog, nga dili na madungog ang inyong tingog. Tungod, ang inyong—inyong pagkinabuhi, ang inyong kinabuhi sa matag adlaw magapamatuod man kung unsa kamo. Nagapamatuod ang Dios. Oo. Ang Balaang Espiritu usa ka selyo, ug ginaselyohan sa usa ka selyo ang parehong bahin sa papel. Makita nila kamo

nga nagatindog *dinhi* ug makita pud kamo pag manguli na kamo. Dili lamang sa simbahan kondili sa matag adlaw sàb nga buluhaton. Selyado kamo sa pareho nga bahin, sa sulod ug sa gawas. Pinaagi sa kalipay nga aduna kamo, ug pinaagi sa kinabuhi nga inyong gikinabuhi, selyado kamo, sa sulod ug sa gawas, nga nasayod kamo nga luwas na kamo ug nasayod pud ang kalibutan nga luwas na kamo, pinaagi sa kinabuhi nga inyong gikinabuhi, kay nagapamatuod man ang Dios. Dalagyon ang Iyang Balaan nga Ngalan! My, gibati ko ang pagkarelihiyiso!

⁷⁷ Palandunga n'yo kini, mga igsoon ko, dinha. Oh! “Ang Akong mga karnero nagapatalinghug sa Akong Tingog, ug sa usa ka dumuloong dili sila monunot.” Oh, pagkanindot gayud nga ang atong mga ngalan anaa diha sa mga palad sa Iyang mga kamot! Anaa kini sa Iyang atubangan, adlaw ug gabii. Ang Iyang Pulong sa kanunay anaa sa Iyang atubangan, og ang Iyang saad. Dili Niya mahikalimtan kini. Ug gihigugma Niya kamo.

⁷⁸ Karon, pamatud-an Niya ang Iyaha Mismo. Dili n'yo na angay'ng ibuka ang inyong baba ug mosulti og usa ka pulong, mahibalo man ang kalibutan nga adunay sa kung unsa nga nahitabo kaninyo.

...nga nagapamatuod, pinaagi sa mga ilhanan ug mga katingalahan, ug sa nagkalainlaing mga milagro, ug pinaagi sa mga gasa sa Espiritu Santo, sumala sa iyang kaugalingong kabubut-on?

⁷⁹ Hisgotan na lang nato ang usa ka Kasulatan sa dili pa tà magtapos; niadtong Adlaw sa Pentecostes, sa dihang nadawat nila ang Balaang Espiritu. Mga upat ka adlaw human niadto, miagi si Pedro sa ganghaan nga gitawag og Matahum, siya ug si Juan. Miingon sila, “Tan-aw kanamo,” ngadto sa usa ka lalaki. Ug ingon siya, “Salapi ug bulawan wala ako'y bisan unsa, apan ang ania kanako igahatag ko kanimo. Sa Ngalan ni Jesus Cristo nga Nazaretnon, tumindog ka ug paglakaw na.” Ug mihangad ang maong lalaki ug wala gayud nagduhaduha mahitungod niadto. Mitindog lang siya ug milakaw na. Mga tawo sila nga walay hibangkaagan ug walay nakat-onan. Apan ang Biblia miingon, “Gikinahanglan nila nga maminaw kanila, kay naila man nila nga sila mao ang nagpakigkauban kang Jesus.”

⁸⁰ Igsoon, pag maila sa kalibutan nga nagpakigkauban ka na kang Jesus, pag makinabuhi mo ang usa ka putli nga kinabuhi dinhi niining kasamtangang kalibutan ug sa niini nga kangitngit, kon maila sa kalibutan ug makita nga nagpakigkauban ka na kang Jesus, pag ang usa ka dautan, og malaw-ay nga bigaon sa kalsada mamahimong usa ka maligdong nga babaye, og nahugasan na sa Dugo sa Cordero, nan ginapamatud-an sa Dios nga buhi gyud Siya.

⁸¹ Ipananglitan tà ang usa ka palahubog, nga ingon gayud ka talamayon tungod nga maluibon siya sa iyang asawa, og

ginamaltrato niya ang iyang mga anak, ug dili sila ginapalitan og pagkaon, aron lang may maibayad sa usa ka bigaon. Pero tugoti siya nga makauban si Jesus sa makausa, makita n'yo mismo siya nga mahibalik, sama ni Legion, nga anaa na sa husto niyang pangisip ug nabistihan na, mahibalik ngadto sa iyang mga anak ug sa iyang asawa ug sa iyang mga minahal sa kinabuhi. Sigurado gyud kana.

⁸² Usa ka higayon kaniadto, mga kuwarenta na ka tuig ang milabay, kaniadtong nagtagbo ang mga relihiyon sa kalibutan, ug may nagkalainlaing mga mibarug ug namulong didto. Ug namulong ang Mohammedan bahin sa relihiyong Mohammedan. namulong pud ang mga Jain bahin sa mga Jain; ang Buddhist usab bahin kang Buddha. Ug ang ubos nga doktor, nakalimtan ko na ang iyang apelyido, niining higayona, nakaila unta ko sa iyang ngalan, pero nakalimtan ko lang, namulong siya aron irepresentar ang Cristianismo, ug gisugilon niya ang estorya mahitungod ni Lady Maccabee nga taga Oklahoma, sa Amerika.

Ang maong babaye ingon gyud ka dautan ug talamayon kaayo, hangtud nga sa dihang patyon na nila siya, ayaw gani nila siyang hawiran, tungod nga malaw-ay kaayo siya ug dautan. Gidakop nila siya tungod sa sala: nga pagpanigarilyo; pagdrayb og karwahe; ug paglapas sa—sa—sa mga balaod, basi sa rekord sa Oklahoma, pag moagi siya sa kalsada, nga nagdrayb og karwahe nga may upat ka kabayo. Ug siya'y dautan kaayo ug mahugaw kaayo nga dili na gani moduol ang katilingban sa kon asa siya nahimutang; nga bisan, niadtong bitayon na siya sa mga tigbitay, wala na nila siya gibitay. Gibuboan na lang nila siya og alkitran ug mga balahibo, sa pagpatay sa iyaha.

Ug sa dihang gisugilon niining ubos nga magwawali ang estorya bahin sa maong babaye, diha sa usa ka paagi, nga ang mga tawo halos anaa sa daplin sa ilang mga lingkoranan, nga nagapaminaw og ayo kung unsa na kaha ang sunod nga mahitabo. Kaniadtong midangat na siya niadtong bahin nga: ingon na ka dautan, mahugaw, og talamayon, hangtud nga ayaw na unta sa balaod nga manginlabot sa maong babaye, tungod ingon na kaayo siya ka lala. Nga bisan ang mismong yawa sa impiyerno isalikway gyud ang ingon niadtong mga tawo, halos, sumala sa iyang pagsugilon mahitungod sa maong estorya. Dayon miingon ang magwawali, “Mga maayong tawo sa mga relihiyon sa kalibutan, ang inyo bang relihiyon aduna og bisan unsa man nga makalimpyo sa mga kamot ni Lady Maccabee?”

⁸³ Padayon ra nga mipuyo ang tanan diha sa ilang mga lingkuranan. Dayon gipalakpak niya ang iyang mga kamot, ug milukso-lukso. Ingon niya, “Himaya sa Dios! Ang Dugo ni Jesus Cristo dili lamang magalimpyo sa iyang mga kamot, kondili pagalimpyohan sab Niini ang iyang kasingkasing ug himoon siya nga Iyang Pangasaw-onon.” Sultihan ko kamo:

Makahibulongang grasya! pagkatam-is nga tingog,
 Nga nagluwas sa usa ka alaut nga sama kanako!
 Ako kaniadto nahisalaag, apan karon ako hingkaplagan,
 Ug buta ako kaniadto, apan karon makakita na ako.
 Grasya ang nagtudlo sa akong kasingkasing nga mahadlok,
 Sa grasya usab nga nahupay ang akong mga kahadlok;
 Pagkabibilhon kana nga grasya nga nagpakita
 Niadtong takna nga una akong mitoo!

⁸⁴ Tinuod gayud. “Unsaon man nato sa paglikay, kung talikdan tà kini?” Ngani kon magpasagad ka nga dili na mokaon, mamatay man ka. Magpasagad ka nga moliko sa usa ka kanto, madisgrasya ka. Magpasagad ka nga dili na gatasan ang baka, nan maughan na kini og gatas. Kon magpasagad ka lang sa imong mga ngipon, nan siguradong ipaibot gyud nimo kana tanan. Mao gayud. Ikaw mismo ang magbayad tungod sa imong pagpasagad.

⁸⁵ Oh, Branham Tabernacle ug sa inyo nga mga bisita, sultihan ko kamo og usa ka butang karon. Kon magpasagad ra kamo nga dili magtestimonyo bahin sa himaya sa Dios, magpasagad ra kamo sa pagdayeg ug paghimaya sa Dios, nan makaplagan n’yo ang inyong kaugalingon nga bugnaw na, pormal, ug nag-backslide na, usa sa niining mga adlaw. Dayega n’yo ang Dios. “Unsaon man nato sa paglikay, kung talikdan tà ang ingon ka dakung kaluwasan?”

⁸⁶ Udto na man diay. Nahitabo man gud nga namatikdan ko si Igsoong Thom, nga miduol dinha sa luyo. Tapuson na nato ug ipadayon ra kini unyang gabii, kon itugot sa Ginoo.

Mag-ampo sa kita sa makadiyut.

⁸⁷ Among Langitnong Amahan, sa Imoha ang mga panalangin, ug mga pagdayeg, ug kadunggan, ug himaya, ug kaalam, ug kusog, ug gahum, hangtud sa kahangturan. Oh, sa Cordero nga nagalingkod sa Trono, ang mga pagbulot-an ug mga gingharian ug ang tanan-tanan gikahatag nganha sa Iyang kamot. Kaniadtong nabanhaw Siya gikan sa mga patay, alang sa pagpamatarung kanamo, misinggit Siya sa kalibutan, “Ang tanang kagahum sa Langit ug yuta gikahatag nganhi sa Akong kamot. Busa, panglakaw kamo, sa tibuk kalibutan ug iwali n’yo ang Maayong Balita.”

Oh, minahal nga naghimalatyong Cordero, ang Imong hamiling Dugo

Dili gayud kini mawad-an og gahum,
 Hangtud ang tanang tinubos nga Iglesia sa
 Dios

Maluwas, aron dili na magpakasala pag-usab.

⁸⁸ Tabangi kami, ingon nga mga ministro, ingon nga nakita namo nga daghan kaayo kami og gipangkinahanglan; kung unsa nga gikinahanglan namo og simbahan, gikinahanglan namo nga maangkon ang *ingon-ani*, gikinahanglan namo nga maangkon ang tanan.

⁸⁹ Ang among mga kababayen-an, nga ginatawag ang ilang mga kaugalingon nga Cristohanon, sa dili pa sila mosimba, kinahanglan sa nilang magsul-ob og usa ka matang sa bisti, o kaha kinahanglan nga makabisti gyud og ingon ka magarbo.

Ug ang mga magwawali sa kinahanglan sa kono nga magkaaduna og ingon ka daghang kuwarta adisir sila mangsangyaw, ug ang tanan kono kinahanglan nga *ingon ani-ug-ingon ana*.

⁹⁰ Oh Cristo, sa diha nga mabasa ko dinhi, kung unsa nga “Sila kaniadto nanagpanglakaw, nanagsaput og mga panit sa mga karnero ug panit sa kanding, nanagpuyo sa mga lungib sa yuta, ug sa mga langub, nanagpangalakaw sila, ilalum sa hilabihan nga pagpanglutos, ug bisan pa man, naangkon gyud ang Pagtoo,” ilalum sa ministerio sa mga manulonda, unsaon kaha namo sa paglikay, sa dihang gihatagan man kami ni Ginoong Jesus og maanindot nga mga panimalay, ug mga sakyanan, mga bisti, ug pagkaon, pero nagabagulbol gihapon, nagalingkod-lingkod ra kami, mga tapolan kami, wala gani kami misulay sa pagpangsangyaw ug mobuhat man lang og usa ka butang para niini, unsaon kaha namo sa paglikay, Dios?

⁹¹ Oh, ginaampo ko nga Imo untang ipadilaab ang kinaraan nga kombiksyon sa matag kasingkasing, niining buntaga, Ginoo, aron ang mga tawo mapadasig ug mamuhat. Mamuhat unta kami samtang nagadan-ag pa ang kahayag sa adlaw, tungod kay ingon gayud ka paspas nga nagasalop ang adlaw. Ug mahuman na ang sibilisasyon, ug mawala na ang panahon. Mopaingon na kini ngadto sa Eternidad.

⁹² Oh Dios, itugot karon nga managpanglakaw kami nga may preskong panan-awon, may kaalam, og may pagsabot, aron mahibalo kami kung unsaon namo sa pagharong ang mga makasasala ug dalhon sila paingon kang Cristo. Dungga intawon ang pag-ampo sa Imong alagad, Ginoo.

⁹³ Ginahangyo ko, kung adunay si kinsa man dinhi, nga wala pa nakaila kang Cristo ingon nga ilang Manluluwas, mahimo ba nga ipataas n’yo ang inyong kamot ug moingon, “Hinumdumi ako, Igsoong Branham”? Mahimo n’yo bang ipataas ang inyong kamot, moingon, “Hinumdumi ako. Ginatinguha ko

nga mamahimong usa ka Cristohanon. Dili ko na gustong magpasagad bahin niini”? Panalanginan ka sa Dios, dinha sa luyo, sir. Aduna pa ba? Moingon, “Gusto kong ipataas ang akong kamot, Igsoong Branham. Ug ginatinguha ko nga dawaton na si Cristo, ingon nga akong Manluluwas, nagpasagad ra man gud ko, sa dugay na nga panahon. Oh, nagasimba man ko, oo, miyembro ako sa iglesia.” 

57-0825M Mga Hebreohanon, Kapitulo Dos #1
Branham Tabernacle
Jeffersonville, Indiana U.S.A.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iyá. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org